



REPUBLIKA E SHQIPËRISË
KËSHILLI I EMËRIMEVE NË DREJTËSI

VENDIM

Nr. 31, datë 17.09.2025

**PËR VLERËSIMIN DHE PIKËZIMIN E KANDIDATURËS SË ZONJËS
GENTA TAFABUNGO NË VENDIN VAKANT, PËR GJYQTAR NË
GJYKATËN KUSHTETUESE, SHPALLUR NGA GJYKATA E LARTË MË
DATË 11.12.2024**

Këshilli i Emërimeve në Drejtësi, i përbërë nga :

Sokol Sadushi	Kryetar
Marjana Semini	Zëvendëskryetare
Ilir Toska	Anëtar
Alma Muça	Anëtare
Fuat Vjerdha	Anëtar
Enkela Vlora	Anëtare relatore
Irma Balli	Anëtare
Etien Kapo	Anëtar
Nafije Hasko	Anëtare

Asistuar nga sekretare Katerina Bilo me praninë e Avokates së Popullit, znj. Erinda Ballanca, në cilësinë vëzhguesit të përhershëm të mbledhjeve dhe veprimtarisë së Këshillit të Emërimeve në Drejtësi (KED), në mungesë të përfaqësuesve të autorizuar të subjekteve të ftuara sipas ligjit për pjesëmarrje, në mbledhjen e datës 17.09.2025, mori në shqyrtim çështjen që i përket:

KANDIDATES: Genta Tafa Bungo

OBJEKTI: Vlerësimi dhe pikëzimi i kandidaturës së Znj. Genta Tafa Bungo, në vendin vakante për gjyqtar në Gjykatën Kushtetuese, të shpallur nga Gjykata e Lartë më datë 11.12.2024.

KËSHILLI I EMËRIMEVE NË DREJTËSI

Këshilli i Emërimeve në Drejtësi 2025

*Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.
Adresa Elektronike : info@ked.gov.al Numra telefonikë : +355 4 2257302*

Pasi dëgjoi relatimin e anëtares së KED-it, zonjës Enkela Vlora, lidhur me mënyrën e procedimit të ndjekur për verifikimin e kandidatit, dhe si bisedoi çështjen në tërësi,

VËREN:

I. Rrethanat e çështjes

1. Në përfundim të procedurës së verifikimit për këtë kandidate, Këshilli i Emërimeve në Drejtësi (në vijim referuar edhe si KED) me vendimin nr. 22, datë 28.07.2025 ka vendosur *“Lejimin e kandidimit të kandidates Genta Tafa Bungo, në vendin vakant për gjyqtar në Gjykatën Kushtetuese, shpallur nga Gjykata e Lartë në datën 11.12.2024”*, vakancë e krijuar në Gjykatën Kushtetuese pas deklarimit të mbarimit të mandatit të gjyqtarës Holta Zaçaj.
2. Në zbatim të dispozitave të ligjit nr. 8577/2000 dhe të ligjit nr. 115/2016, si edhe atyre të Kreut IV (pikat 27-38) të vendimit nr. 5 datë 02.04.2019 *“Për kriteret dhe procedurën e vlerësimit, pikëzimit dhe renditjes së kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”*, anëtarja e Këshillit, znj. Enkela Vlora, në cilësinë e relatores të vendit vakant të cituar më lart, ka realizuar veprimet përgatitore të procedurës së vlerësimit dhe pikëzimit të kandidatëve, njëkohësisht me procedurat e verifikimit të tyre.
3. Këshilli i Emërimeve në Drejtësi, pasi shqyrtoi procedurat e ndjekura gjatë veprimeve përgatitore nga relatorja dhe plotësinë e dokumentacionit të paraqitur për vlerësim nga secili kandidat, dëgjoi mendimin e Avokatit të Popullit lidhur me mënyrën e procedimit të ndjekur për përgatitjen e dokumentacionit të kandidatëve, me vendimin e datës 09.09.2025 ka vendosur fillimin e procedurave të vlerësimit, pikëzimit dhe renditjes së kandidatëve të lejuar për vendin vakant për gjyqtar në Gjykatën Kushtetuese, vakancë e krijuar në Gjykatën Kushtetuese pas deklarimit të mbarimit të mandatit të gjyqtarës Holta Zaçaj.
4. Bazuar në aktet që janë dorëzuar nga kandidatja Genta Tafa (Bungo) në momentin e kandidimit dhe gjatë fazës përgatitore të procedurës së vlerësimit, anëtarja e Këshillit, relatore e vendit vakant në të cilën kjo kandidate ka paraqitur kandidaturën e saj, hartoi relacionin përkatës për gjetjet në procedurën e vlerësimit të kësaj kandidateje për gjyqtar në Gjykatën Kushtetuese, i cili i është njoftuar kandidates.
5. Kryetari i Këshillit ka thirrur mbledhjen e Këshillit në datën 16.09.2025, ora 13:00, për zhvillimin e intervistës dhe testimin e njohurive të gjuhës së huaj me kandidatët e lejuar. Kandidatja Genta Tafa Bungo përzgjedhi të intervistohet në gjuhë të huaj (anglisht), për pasojë me vendimin nr. 26, datë 11.09.2025 të KED, u vendos marrja e ekspertit të gjuhës së huaj.
Në datë 12.09.2025, kandidatja u njoftua për vendimin për caktimin e datës së intervistës dhe testimit të gjuhës së huaj si dhe caktimin e ekspertes znj. Etleva Kondi. Kandidatja mori dijeni, dhe deklaroi se nuk ka shkaqe papajtueshmërie me ekspertin.

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.
Adresa Elektronike : info@ked.gov.al Numra telefonikë : +355 4 2257302

6. Intervista mbi motivimin e kandidimit me kandidaten Genta Tafa Bungo u zhvillua në mbledhjen e Këshillit të datës 16.09.2025.

II. Parimet dhe burimet ligjore që udhëheqin vlerësimin

7. Këshilli i Emërimeve në Drejtësi (KED) vepron mbi bazën e Kushtetutës dhe Ligjit nr. 115/2016, duke zbatuar rregullat procedurale të Vendimit nr. 4, datë 11.03.2019 (procedura e verifikimit) dhe metodologjinë e Vendimit nr. 5, datë 02.04.2019 (kriteret/peshët e pikëzimit). Këto akte garantojnë kompetencën e organit, rregullshmërinë formale dhe mjetet e transparencës për një vendimmarrje të arsyetuar, të verifikueshme dhe të drejtë. Parimet mbizotëruese: (i) *ligjshmëria*, (ii) *barazia dhe mosdiskriminimi*, (iii) *paanësia dhe shmangia e konfliktit të interesit*, (iv) *e drejta e dëgjimit dhe transparenca*, (v) *proporcionaliteti dhe arsyetimi*, (vi) *parashikueshmëria dhe konsistenca në zbatimin e kritereve*.

▪ Rregullshmëria procedurale (shorti, njoftimet, verifikimi, votimi)

8. Procesi i vlerësimit nisi me caktimin me short të relatorit dhe përcaktimin e këshilltarëve ligjorë; vijoi me njoftimet ndaj institucioneve dhe kandidatëve, administrimin e materialeve, verifikimet sipas Vendimit nr. 4 (përfshirë kontrollet e integritetit, pasurisë dhe papajtueshmërisë) dhe me mbledhjen ku bëhet diskutimi i raporteve dhe votimi i hapur. Publikimi i rezultatit dhe përgatitja e “raportit të arsyetuar” siguron transparencën e aktit përfundimtar.

9. Respektimi i këtyre hapave është kusht i domosdoshëm për ligjshmërinë e pikëzimit: dështimi në cilindo hap do të cënonte aktin. Në rastin konkret, dokumentet e administruara dhe tabelat përfundimtare pasqyrojnë ecuri të përputhur me skemën ligjore.

▪ Metodologjia: kriteret, pesha dhe “mesatarja kolegjiale”

10. Metodologjia e KED strukturohet në tri blloqe: (1) Meritat Profesionale (deri 60 pikë), (2) Meritat Morale (deri 30 pikë), (3) Meritat Organizative/Drejtues-Menaxheriale (deri 10 pikë). Brenda secilit bllok, nën-kriteret dhe indikatorët janë të paracaktuar (p.sh., vjetërsi/arsim/“pesë dokumente”/gjuhë për bllokun profesional; integritet/reputacion për bllokun moral; platforma/vizioni për bllokun organizativ). Çdo anëtar i KED vlerëson individualisht; rezultati përfundimtar është mesatarja e pikëve të 9 anëtarëve (“mesatarja kolegjiale”). Kjo teknikë zvogëlon ndikimin e çdo skaji individual (shumë i lartë ose shumë i ulët) dhe e bën totalin produkt të një vlerësimi kolegjial, jo të një individi. Për rrjedhojë, edhe kur anëtarët ndryshojnë në nuanca, ligjshmëria e vendimit ruhet nëse kriteret zbatohen njësoj dhe arsyetimi është i pranishëm.

▪ Testet e ligjshmërisë së vlerësimit (kontrolli i brendshëm i KED)

11. Për të qenë i qëndrueshëm juridikisht, pikëzimi kalon disa “teste” të brendshme kontrolli:

-Testi i kompetencës dhe formës: organi i duhur, akti në formën e ligjit dhe rregullit të brendshëm; procesverbalet dhe tabelat ekzistuese;

Këshilli i Emërimeve në Drejtësi 2025

Adresa Postare : GJKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

- Testi i procedurës: shorti, njoftimet, verifikimi, e drejta e dëgjimit, mbledhja, votimi i hapur, raportimi i arsyetuar.
- Testi i kriterit: zbatimi i njëjtë i metodologjisë (60/30/10) për të gjithë kandidatët, pa shmangie nga treguesit e paracaktuar.
- Testi i barazisë: trajtim i njëjtë i situatave të njëjta dhe arsyetim i diferencave kur ekzistojnë.
- Testi i proporcionalitetit: pikët në raport të drejtë me provat (as nën- e as mbi-vlerësim i pajustificuar).
- Testi i arsytimit: lidhje e qartë “provë → nën-kriter → pikë → total”.
- Testi i transparencës: publikim i renditjes dhe tabelave, mundësia e verifikimit publik.

III. Vlerësimi i Këshillit të Emërimeve në Drejtësi

12. Në përfundim të intervistës, bazuar në të dhënat e nxjerra nga biseda mbi motivimin e kandidimit, si edhe bazuar në aktet dhe dokumentet që janë dorëzuar nga kandidata Genta Tafa (Bungo) në momentin e paraqitjes së kërkesës për kandidim, dokumente të paraqitura prej saj sipas kërkesave të Këshillit, si edhe shkresa dhe të dhëna të tjera të kërkuara apo të ardhura zyrtarisht nga institucione të ndryshme, Këshilli ka vënë në bisedim vlerësimin dhe pikëzimin e kandidates Genta Tafa Bungo për secilin nga kriteret e vlerësimit të përcaktuara:
 - a) në pikën 4 dhe 5 të nenit 125 të Kushtetutës;
 - b) në nenin 7/a të ligjit nr. 8577/2000 “Për organizimin dhe funksionimin e Gjykatës Kushtetuese të Republikës së Shqipërisë”, të plotësuar, për aq sa nuk përcaktohet ndryshe në këto dispozita, me kriteret e përgjithshme të vlerësimit të parashikuara në nenin 240 të ligjit nr. 115/2016;
 - c) në detajimin e mëtejshëm të kriterëve ligjore të posaçme dhe të përgjithshme të vlerësimit dhe përcaktimin më të hollësishëm të peshës specifike të tyre në pikëzimin dhe renditjen e kandidatëve të treguar në Kreun II, në Kreun V dhe në Shtojcën 1 të Vendimit nr. 5 datë 02.04.2019 “Për kriteret dhe procedurën e vlerësimit, pikëzimit dhe renditjes së kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”;
 - d) në shpjegimet e hollësishme lidhur me metodologjinë mbi të cilin bazohet vlerësimi dhe caktimi i pikëve të miratuar nga Këshilli i Emërimeve në Drejtësi me vendimin nr. 51 datë 21.06.2019 “Për miratimin e metodologjisë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese”.

A. Meritat profesionale – Historiku Arsimor dhe Profesional

Vjetërsia në profesion

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.
Adresa Elektronike : info@ked.gov.al Numra telefonikë : +355 4 2257302

13. Në shkronjën “a” të pikës 3 të nenit 7/a të ligjit nr. 8577/2000, përcaktohet si kriter vlerësimi “Vjetërsia në profesion”. Ndërkohë që, sipas nenit 125 të Kushtetutës dhe nenit 7/a pika 2 shkronja “a” të ligjit nr. 8577/2000, përbën kusht lejimi kandidimi që kandidati të ketë së paku 15 vjet përvojë profesionale si gjyqtarë, prokurorë, avokatë, profesorë ose lektorë të së drejtës, nëpunës (jurist) të nivelit të lartë në administratën publike.
14. Prandaj, Këshilli vlerëson me pikë kohëzgjatjen e të gjithë përvojës profesionale të secilit kandidat, në maksimum deri në 4 pikë, sikurse orientohet në tabelën e përshkallëzuar të pikëzimit të vjetërsisë në profesion të treguar në Metodologjinë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin nr. 51, datë 21.06.2019.
15. Sipas jetëshkrimit dhe dokumentacionit të administruar në procedurën e verifikimit të kandidaturës dhe në kuadër të veprimeve përgatitore të procedurës së vlerësimit, rezultojnë që kandidatja Genta Tafa Bungo, ka ushtruar veprimtaritë profesionale si më poshtë:

- a) *Specialiste pranë Ministrisë së Punëve të Jashtme, nga data 16.11.1993 deri në datë 16.01.1996 – periudha e punësimit 2 (dy) vite e 2 (dy) muaj;*
- b) *Asistent pedagoge në Fakultetin e Drejtësisë, Universiteti i Tiranës; nga data 01.02.1996 deri në datë 15.09. 2003 – periudha e punësimit 7 (shtatë) vite, 7 (shtatë) muaj, 14 (katërmëdhjetë) ditë;*
- c) *Përgjegjëse sektori në Ministrinë e Brendshme (ish Ministrinë e Pushtetit Vendor dhe Decentralizimit), nga data 16.09.2003 deri në datë 30.06.2004 – periudha e punësimit 9 (nëntë) muaj e 14 (katërmëdhjetë) ditë.*
- d) *Drejtor i Drejtorisë Juridike pranë Ministrisë së Brendshme (ish Ministrinë e Pushtetit Vendor dhe Decentralizimit), nga data 01.07.2004 deri në datë 23.12.2005 – periudha e punësimit 1 (një) vit, 5 (pesë) muaj e 22 (njëzet e dy) ditë;*
- e) *Pedagoge në Universitetin “Justiniani” shpk, nga data 01.01.2009 deri në datë 29.02.2012 – periudha e punësimit 3 (tre) vjet, 2 (dy) muaj;*
- f) *Juriste pranë “Debit Collection” shpk, nga data 01.07.2012 deri në datë 16.07.2013 – periudha e punësimit 1 (një) vit, e 15 (pesëmbëdhjetë) ditë;*
- g) *Përmbarues gjyqësor pranë “Speed Solution” shpk, nga data 13.07.2013 deri në datë 28.06.2017 - periudha e punësimit 3 (tre) vite, 11 (njëmbëdhjetë) muaj e 15 (pesëmbëdhjetë) ditë;*
- h) *Komisionere/ Kryetare pranë Komisionit të Pavarur të Kualifikimit, nga data 17.06.2017 - 31.12.2024, kohëzgjatja në detyrë 7 (shtatë) vjet, 6 (gjashhtë) muaj e 14 (katërmëdhjetë) ditë;*

Kandidatja Genta Tafa Bungo gjithashtu rezultojnë të ketë mbajtur pozicione akademike lektore/pedagoge e jashtme me kohë të pjesshme si më poshtë:

- i. *Pedagoge e Jashtme Universiteti i Elbasanit “Aleksandër Xhuvani”, Elbasan 2012-2013*
- ii. *Pedagoge e Jashtme “Albanian University” Mars 2009- Qershor 2009; Tetor 2013-Shkurt*
- iii. *Lektore e ftuar/ Udhëheqëse Disertacionale UET 2014 - pa afat*
- iv. *Pedagoge e Jashtme Kolegji ‘Luarasi’ 2016-2017 dhe 2004-2005*
- v. *Pedagoge e Jashtme ‘Marin Barleti’ 2008-2009, dhe 2009-2010*
- vi. *Universiteti “Kristal” Mars - Dhjetor 2007 dhe Shtator -Dhjetor 2008.*

Këshilli i Emërimeve në Drejtësi 2025

*Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.
Adresa Elektronike : info@ked.gov.al Numra telefonikë : +355 4 2257302*

vii. *Universiteti "Justicia" Tetor 2009 dhe Shkurt 2011*

16. Mbështetur në të dhënat e sipërcituara, rezulton se në rastet e veprimtarive sipas shkronjave "d", "e" dhe "h" si dhe nga tërësia e eksperiencave si lektore/pedagoge e jashtme me kohë të pjesshme (*sipas pikave i-vii*) kandidatja Genta Tafa Bungo ka ushtruar veprimtari profesionale në fushat e përcaktuara sipas nenit 125 të Kushtetutës dhe nenit 7/a të ligjit nr. 8577/2000. Mbështetur në të dhënat e sipërcituara, rezulton se në momentin e përpilimit të relacionit të vlerësimit (Shtator 2025), kjo kandidat ka 15 vite, 4 muaj e 4 ditë vjetërsi në profesion si jurist i nivelit të lartë dhe në fushën e veprimtarive të tjera profesionale sipas përcaktimeve të nenit 125 të Kushtetutës dhe nenit 7/a të ligjit nr. 8577/2000, të renditura në pikën 15 më sipër.
- Ndërkohe përfshirë edhe eksperiencat e tjera, kandidatja Genta Tafa Bungo ka 27 vite, 7 muaj dhe 9 ditë vjetërsi në profesion si juriste.
17. Nga kjo eksperiencë Këshilli vlerësoi përvojën e gjatë akademike të kandidatës si autore e teksteve dhe artikujve shkencorë, mbajtjen e funksioneve të larta në administratën publike dhe kompetencave *quasi-gjyqësore* si Komisionere dhe Kryetare e KPK.
18. Për këto arsye, për kriterin e vlerësimit "vjetërsia në profesion", nisur nga ushtrimi i veprimtarive profesionale të sipërcituara për 27 vite, 7 muaj dhe 9 ditë vjetërsi në profesion si juriste, Këshilli çmoi ta vlerësojë kandidaten Genta Tafa Bungo me **36 Pikë**.

Historiku Arsimit

19. Në shkronjën "d" të pikës 3 të nenit 7/a të ligjit nr. 8577/2000, përcaktohet si kriter vlerësimi edhe ecuria gjatë kryerjes së arsimit të lartë me një notë mesatare jo më pak se 8 ose të barasvlefshme me të, ndërkohë që edhe shkronja "c" e pikës 1 të nenit 240 të ligjit nr. 115/2016 kërkon të vlerësohen rezultatet gjatë studimeve në ciklet e arsimit të lartë.
20. Prandaj, Këshilli vlerëson me pikë ecurinë gjatë kryerjes së arsimit të lartë me një notë mesatare jo më pak se 8 ose të barasvlefshme me të, të secilit kandidat, sipas përshkallëzimit me 1 pikë të notës mesatare mbi 8 dhe me 2 pikë të notës mesatare mbi 9, sikurse orientohet në Metodologjinë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin nr. 51, datë 21.06.2019.
21. Sipas jetëshkrimit dhe dokumentacionit të administruar në procedurën e verifikimit të kandidaturës dhe në kuadër të veprimeve përgatitore të procedurës së vlerësimit, rezulton që kandidatja Genta Tafa Bungo ka përfunduar studimet e larta në Universitetin e Tiranës në Fakultetin e Drejtësisë në periudhën 1989-1993, duke u diplomuar në datë 28.09.1993 me titullin "*Jurist*". Në zbatim të neneve 75 dhe 124 të ligjit nr. 80/2015 "Për arsimin e lartë dhe kërkimin shkencor në institucionet e arsimit të lartë në Republikën e Shqipërisë" ky lloj arsimimi kualifikohet si arsim i lartë juridik, Diplomë e Nivelit të Dytë.

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.
Adresa Elektronike : info@ked.gov.al Numra telefonikë : +355 4 2257302

22. Në bazë të certifikatës së notave të lëshuar nga Fakulteti i Drejtësisë, Universiteti i Tiranës kandidatja Genta Tafa Bungo rezulton se ka përfunduar studimet universitare me notë mesatare 9.8, dhe ka kryer mbrojtjen e diplomës me Notën 10.
23. Për sa më lart, nisur nga përlllogaritja e kryer nga Këshilli sipas të cilës nota mesatare e arritur nga kandidatja Genta Tafa Bungo gjatë studimeve dhe diplomimit në Fakultetin e Drejtësisë në Universitetin e Tiranës është 9.8, për kriterin e vlerësimit *“historiku arsimor”*, Këshilli çmoi ta vlerësojë kandidatin me **18 Pikë**.

Kualifikime Pasuniversitare

24. Në pikën 3 të nenit 7/a të ligjit nr. 8577/2000 dhe pikat 1 e 4 të nenit 240 të ligjit nr. 115/2016, si edhe në vendimin nr. 5 datë 02.04.2019 të Këshillit të Emërimeve në Drejtësi të nxjerrë në bazë e për zbatim të ligjit, përcaktohet si kriter vlerësimi kualifikimet pasuniversitare. Ky kriter vlerëson llojin dhe nivelin e angazhimit të kandidatit në ndjekjen e veprimtarive të kualifikimit profesional që mundësojnë arritjen e një profesionalizmi më të madh në shërbim të ushtrimit të funksioneve dhe detyrimeve profesionale të tilla si, pasja e titujve akademikë, gradave shkencore, ecuria dhe kryerja e kualifikimeve pasuniversitare, studimeve dhe specializimeve afatgjata (përfshirë Shkollën e Magjistraturës), si edhe kryerja e trajnimeve afatgjata dhe afatshkurtra në fushën e të drejtave kushtetuese, të drejtave të njeriut, si edhe në fusha të tjera të së drejtës.
25. Referuar kriterëve ligjore të vlerësimit dhe metodologjisë së pikëzimit, që gjejnë pasqyrim në mënyrë të detajuar në Shtojcën nr. 1 të vendimit nr. 5 datë 02.04.2019 të Këshillit të Emërimeve në Drejtësi kualifikimeve pasuniversitare, si një nga indikatorët me të cilët vlerësohet niveli profesional i kandidatëve, u janë caktuar në total 8 pikë.
26. Prandaj, në zbatim të ligjit, Këshilli i Emërimeve në Drejtësi vlerëson me pikë llojin e titujve akademikë dhe gradave shkencore, llojin, kohëzgjatjen, fushën dhe vendin e kryerjes së kualifikimeve pasuniversitare, studimeve, specializimeve dhe trajnimeve të kandidatëve, duke pasur parasysh shpërndarjen e pikëve sipas vendimit nr. 5 datë 02.04.2019 të këtij Këshilli, si edhe orientimet që përmbahen në Metodologjinë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin nr. 51 datë 21.06.2019.
27. Sipas jetëshkrimit dhe dokumentacionit të administruar në procedurën e verifikimit të kandidaturës dhe në kuadër të veprimeve përgatitore të procedurës së vlerësimit, rezulton se kandidatja Genta Tafa Bungo ka kryer studime pasuniversitare:
- në programin *“Master në Shkencat Publike”* pranë Universitetit të Tiranës, Fakulteti i Drejtësisë, në periudhën 2001-2003 dhe ka mbrojtur mikro-tezën me temë *“Tatimet e dyfishta”*.
 - Ka kryer studime doktorature pranë Universitetit të Tiranës, Fakulteti i Drejtësisë, dhe ka fituar gradën shkencore *“Doktor”* në të Drejtën Publike (disertacion me temë *“Mbi tatimet e dyfishta”*), me nr. 147 diplome, datë 18.06.2008.

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.
Adresa Elektronike : info@ked.gov.al Numra telefonikë : +355 4 2257302

- Kandidatja ka fituar gradën “*Profesor i Asociuar*”, me nr. Dëshmie 29, lëshuar nga Universiteti i Tiranës, më 03.06.2014.
28. Sipas Metodologjisë së Vlerësimit dhe Caktimin e Pikëve, për studimet pasuniversitare në nivelin “*Master Shkencor*”/ *Master* ekzekutiv vlerësimi është **3 Pikë**; gjithashtu kandidatja mban gradën shkencore “*Doktor*” për të cilin vlerësimi është **4 pikë**, si dhe mban titullin akademik “*Profesor i Asociuar*” për të cilin vlerësimi është **5 pikë**. Për këto arsye, për këtë kriter vlerësimi, për kandidaten do të mbahet në vëmendje se ka fituar titull akademik dhe Këshilli çmoi ta vlerësojë kandidaten Genta Tafa Bungo, me **45 Pikë**.
29. Për treguesin e vlerësimit “*Trajnimet e tjera*”, vlerësohen veçanërisht trajnime me një kohëzgjatje minimale 2 javore, duke mbajtur parasysh edhe numrin, llojet, tematikat dhe kohëzgjatjet e përgjithshme të trajnimeve në fusha të caktuara, institucionet trajnuese, si dhe nëse trajnimet janë shoqëruar me një certifikatë vlerësimi. Lidhur me këtë kriter vlerësimi, Këshilli mund të caktojë deri në 2 pikë.
30. Nga akti dokument i jetëshkrimit të kandidatit që ndodhet në dosjen e kandidimit rezulton se kandidatja Genta Tafa (Bungo), deklaron se ka kryer këto trajnime:
- Seminar trajnimi "Local and Regional Self-Government and Transfrontier Co-operation", Trieste, Itali -zhvilluar nga Komisioni i Venecias, Këshilli i Evropës, në periudhën 5-9 Prill 2004
 - Seminar trajnimi tre-javor "Hermes" EU Tempus JEP Project-Study Visit Series"- zhvilluar nga Universiteti i Athinës (Greqi), Univesiteti i Bordosë (Francë), Universiteti i Napolit (Itali), organizuar në kuadër të European Public Law Center, në periudhën Maj-Nëntor 1999
 - Shkolle vere, diplomuar në "Monetary Policy Issues in Europe"dhe "Policy-Making in the EU"- zhvilluar nga Universiteti i Vjenës, në periudhën 13 Korrik-12 Gusht 1996
 - Specializim shtatë mujor për të drejtën ndërkombëtare- zhvilluar nga Universiteti i Leiden Hollande, në periudhën Janar-Korrik 1993
31. Sa më sipër, mbështetur në të dhënat e jetëshkrimit të kandidates dhe dokumentacionit të administruar në procedurën e verifikimit të kandidaturës, si dhe duke pasur parasysh numrin, llojin, kohëzgjatjen, shtrirjen në kohë dhe tematikat e veprimtarive trajnuese të ndjekura nga kandidatja Genta Tafa Bungo, për këtë kriter ligjor vlerësimi Këshilli çmoi ta vlerësojë me **9 Pikë**.

Njohja e gjuhëve të huaja

32. Në shkronjën “c” të pikës 4 të nenit 240 të ligjit nr. 115/2016, si edhe në vendimin nr. 5 datë 02.04.2019 të Këshillit të Emërimeve në Drejtësi të nxjerrë në bazë e për zbatim të ligjit, përcaktohet si kriter vlerësimi niveli i zotërimit të gjuhëve të huaja.
33. Prandaj, në zbatim të ligjit, Këshilli i Emërimeve në Drejtësi vlerëson me pikë llojin dhe numrin e gjuhëve të huaja, si edhe nivelin e zotërimit të tyre nga ana e kandidatëve,

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.
Adresa Elektronike : info@ked.gov.al Numra telefonikë : +355 4 2257302

duke pasur parasysh sasinë e pikëve maksimale përkatëse sipas vendimit nr. 5, datë 02.04.2019 të këtij Këshilli, si edhe orientimet që përmbahen në Metodologjinë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin nr. 51, datë 21.06.2019.

34. Nga aktet që ndodhen në dosjen e kandidimit rezulton se kandidatja ka vetëdeklaruar në jetëshkrim se njeh shumë mirë gjuhën Italiane dhe Gjermane por nuk ka dorëzuar dokument për të provuar njohjen e asnjërës prej tyre.

Në lidhje me njohjen e gjuhës Angleze kandidatja ka përcjellë si dokument provues: TOEFL “Examinee’s score record” (Dëshmia e rezultatit të testimit)- e Janarit 1998, me një total prej 537 pikësh.

35. Në Metodologjinë e Vlerësimit dhe Caktimit të Pikëve lidhur me këtë kriter vlerësimi citohet ndër të tjera se, për vlerësimin e njohurive për gjuhët e huaja, në rastet kur Këshilli e vlerëson të nevojshme, do të caktojë ekspertë të gjuhës së huaj, të cilët japin mendim për shkallën e zotërimit të aftësive gjuhësore të kandidatit/es. Shkalla e zotërimit të aftësive gjuhësore të kandidatit/es mund të vlerësohet deri në 3 Pikë. Gjithashtu, Këshilli mban parasysh edhe zotërimin e gjuhëve të tjera të deklaruara për të cilat kandidatja nuk testohet gjatë intervistës, me kushtin që të jenë të shoqëruara me dokumente vlerësuese të vlefshme për nivelin e njohurive të tyre. Në këtë rast, krahas vlerësimit konkret me pikë për gjuhën e huaj të zgjedhur prej tij/saj për pikëzim, kandidatit/es mund t’i shtohet 1 Pikë.

36. Kandidatja Genta Tafa Bungo u testua në gjuhën angleze, në datën 16.09.2025, prej ekspertes së përcaktuar nga Këshilli i Emërimeve në Drejtësi sipas vendimit Nr. 26, datë 11.09.2025, znj. Etleva Kondi. Në vijim, në përfundim të intervistës, ekspertja ka përcjellë nëpërmjet shkresës Nr. 296, datë 17.09.2025 “Mendim” vlerësimin e saj mbi kandidaten e intervistuar si më poshtë:

“ Në datën 1.09.2025, në vijim të intervistës së Këshillit të Emërimeve në Drejtësi lidhur me motivimin dhe vizionin e kandidates, sipas detyrës së ngarkuar, kam realizuar bisedën dhe diskutimin në gjuhën angleze me kandidaten për Gjyqtare Kushtetuese, Genta Tafa Bungo.

*Kandidatja shfaq një zotërim shumë të mirë të aftësive njohëse dhe komunikuese në gjuhën angleze si në kontekstin e përditshmërisë dhe në fushën e specialitetit. Përdor struktura gjuhësore të sakta, terminologji të pasur dhe dëshmon aftësinë për të argumentuar në mënyrë të qartë dhe bindëse përgjigjet për pyetjet e parashtruara, duke dëshmuar profesionalizëm dhe maturi. Mbështetur në këtë arsyetim, shkallën e zotërimit të gjuhës angleze nga kandidatja Genta Tafa Bungo e vlerësoj me **3 (tre) pikë**.”*

37. Këshilli, vlerësoi të dhënat që përmban dosja e kandidimit nga ku rezulton se kandidatja ka paraqitur dokument vlerësues të vlefshëm për aftësitë e saj gjuhësore në gjuhën e huaj si dhe është testuar nga ekspertja e caktuar nga Këshilli për nivelin e njohurive të gjuhës(anglisht), çmoi ta vlerësojë kandidaten Genta Tafa Bungo për këtë kriter ligjor vlerësimi, në total me **27 Pikë**.

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

B. Meritat profesionale – Kualifikimi i Përgjithshëm Profesional

38. Në shkronjën “ç” të pikës 3 të nenit 7/a të ligjit nr. 8577/2000 dhe në shkronjën “a” të pikës 1 të nenit 240 të ligjit nr. 115/2016, si edhe në vendimin nr. 5 datë 02.04.2019 të Këshillit të Emërimeve në Drejtësi të nxjerrë në bazë e për zbatim të ligjit, në lidhje me kualifikimin e përgjithshëm profesional, përcaktohen si kritere vlerësimi, në bazë të treguesve shkencorë, performanca e dalluar dhe rezultatet e larta në ushtrimin e profesionit, që mbështetet ndërmjet të tjerave në botimet dhe artikujt shkencorë në fushën juridike, në produktet profesionale sipas profileve të ushtrimit të profesionit, rezultatet e vlerësimit profesional dhe të etikës të kandidatëve në punët që kanë bërë në të shkuarën, nëse ka, ose rezultatet e dallueshme të arritura gjatë përvojave të tyre të punës e që lidhen me ushtrimin e funksioneve në fushën përkatëse.

39. Prandaj, në zbatim të ligjit, Këshilli i Emërimeve në Drejtësi vlerëson me pikë si sasinë ashtu edhe cilësinë e rezultateve profesionale, me një fokus të veçantë tek cilësia. Në këtë mënyrë, bazuar në të dhënat e mundshme të disponueshme për vlerësim, mbahen parasysh sasia e pikëve maksimale prej 30 pikësh, sipas vendimit nr. 5, datë 02.04.2019 të KED, si edhe orientimet për caktimin e mundshëm të një maksimumi prej 25 pikësh për sa i përket vlerësimit cilësor dhe të një maksimum prej 5 pikësh për vlerësimin e sasisë së rezultateve profesionale sipas Metodologjisë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin nr. 51, datë 21.06.2019.

40. Në rastin e kandidates Genta Tafa Bungo, Këshilli shqyrtoi dokumente profesionale dhe të dhënat që mund të disponoheshin nga veprimtaria e saj profesionale, si edhe nga kontributet e tjera profesionale të kësaj kandidateje në veprimtari të ndryshme, përfshirë publikime apo punime e artikuj shkencorë.

41. Nga aktet që ndodhen në dosjen e kandidimit rezulton se kandidatja Genta Tafa Bungo ka dorëzuar punimet profesionale si më poshtë vijon:

Publikime Profesionale (Tekste:

- Botim “Shkenca mbi financat dhe e drejta financiare”, autore Genta Tafa (Bungo), ISBN:978-99956-32-03-8, Shtëpia Botuese “Adelprint”, Nëntor 2009, botim i dytë i ripunuar.
- Botim “Sociologjia e së Drejtës”, autore Genta Tafa (Bungo), ISBN:978-9928-127-34-1, Shtëpia Botuese “Albanian University Press”, Korrik 2013
- Botim “Shkenca mbi financat dhe e drejta financiare”, autore Genta Tafa (Bungo), Shtëpia Botuese “Ilar”, Nëntor 2007, botim i parë, miratuar nga Fakulteti i Drejtësisë.

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

Artikuj Shkencorë:

- Revista "Academicus" Nr.3/2011 - "*Basic principles of the system of social services and assistance*" autore e dytë;
- Revista "Justiniani I" nr. 1/2009 - "*Drejt një sociologjie evropiane të së drejtës*";
- Revista "Jeta Juridike" nr. 3/2006- "*Analizë e Konventës Model OECD për shmangien e tatimeve të dyfishta*";
- Revista e Fakultetit të Drejtësisë nr. 1/2006- "*Arti i negocimit të marrëveshjeve tatimore*";
- Revista "*E drejta parlamentare dhe politikat ligjore*" nr. 30/2006- "*Kodi i familjes dhe mbiemri pas martesor*";
- Revista e Fakultetit të Drejtësisë 2001- "*Tatimet e dyfishta, si lindin dhe si shmangen*";
- Revista "Jeta Juridike" Nr.2, Viti IX i botimit, Tiranë, Qershor 2011- "*Procedurat e konceptimit Tatimor në Republikën e Shqipërisë*";
- Revista "Studime juridike", Tiranë, 2011, ISSN22203990- "*Konceptimi i së drejtës në proceset e integritit në Bashkimin Evropian*";
- Revista "Academicus", Nr.6/2012- "*Reformation of tax procedures along the European Integration Process*";
- Revista "International Journal of Management Cases", ISSN 1741-6264 – "*Analysing double taxation: the Albanian case*", Doc nr.68 dorëzuar me aplikimin;
- "*Decentralizimi fiskal: një sfidë e vazhdueshme e autonomisë vendore në Shqipëri*" titulli origjinal: *Fiscal Decentralization: a permanent challenge of local autonomy in Albania* publikuar në Revistën Curentul Juridic-Juridical Current, Year XV, NO. 1(48), 2012. (ISSN 1224-9173).

Pjesëmarrje në Konferenca Shkencore:

- 6-7 Maj 2010- "*European challenge in the field of personal income tax*" in: Tirana International Conference on "*Challenges of Albania's integration in EU*", organized by: UT, Sapienza and U.F.O. University.
- 21 Maj 2010- "*Përmirësimi i procedurave tatimore në rrugën drejt Bashkimit Evropian*" në Konferencën Nderkombëtare "*Legislacioni dhe drejtësia shiptare përballë sfidave të integritit në Bashkimin Evropian*", organizuar nga Universiteti "Justiniani I", Shkolla e Magjistraturës Tiranë, Universiteti Shtetëror i Tetovës.
- 10 Dhjetor 2010- "*Local finances - the challenge of the South-Eastern Europe countries in their way towards EU*" in International Conference on "*Challenges of Economic European Integration Western Balkan*", organized by: Luigi Gurakuqi University, Faculty of Business, Shkodër. Bashkëautore e pare.
- 11-12 Dhjetor 2010- "*The albanian tax legislation facing the challenge of reformation towards european integration*" në Konferencën Ndërkombëtare të organizuar nga Fakulteti i Ekonomisë i Universitetit të Tiranës me temë

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

"Economic & Social Challenges and Problems 2010 - At the time of Global Crisis and Integration": Bashkëautore e pare.

- 27 Shkurt 2011- *"Reformimi i administratës tatimore - garanci për të drejtat e tatimpaguesve"* në: Konferencën Shkencore Kombëtare : *"Mekanizmat mbrojtës të të drejtave të individëve në kuadër të procesit të rregullt ligjor"*, organizuar nga Fakulteti i Drejtësisë, Departmenti i së Drejtës Publike në bashkëpunim me Qendrën për Nisma Ligjore Qytetare.

- 8-9 Prill 2011- *"The challenge of fiscal decentralisation in Albania and other transition countries"* in: *Third International Scientific Conference: "Economic Policy and EU Integration"*, organized by: Aleksander Moisiu University, Faculty of Business, Durres. Bashkëautore e parë.

- 30 Prill 2011- *"Decentralizimi financiar në Shqipëri dhe sfidat e tij"* në: Konferencën Kombëtare : *"Qeverisja vendore në Shqipëri: realitete, sfidat dhe e ardhmja në kuadër të proceseve integruese të vendit"* te organizuar nga UET.

- 23-24 Shtator 2011- *"The role of courts in resolving business disputes in South Eastern Europe"* in: *"1st International Scientific Conference: "European integration of SEE countries - challenges or reality"* organized by "Eqrem Cabej" University of Gjirokastra - Economic Department.

- 4-5 Nëntor 2011- *"The crime of tax evasion in transition economies"* in: *First International Scientific Conference on "The State, Society and Law : Between Transition and Consolidation"*, organized by: Aleksander Moisiu University, Faculty of Political Sciences and Law, Durres.

- 20 Tetor 2012- *"Domicile and residence of individuals under EC Law and Albanian Legislation"* in: *First International Conference on "South-East European Countries towards European Integration"* organized by: Universiteti "Aleksander Xhuvani", Fakulteti Ekonomik, Elbasan.

5 dokumentet e përzgjedhura nga kandidati

i. Punimin me titull *"Fiscal Decentralization: a permanent challenge of local autonomy in Albania"*, publikuar në Revistën Curentul Juridic-Juridical Current, Year XV, NO. 1(48), 2012. (ISSN 1224-9173).

ii. Referatin me titull *"European challenge in the field of personal income tax"*, referuar në: Tirana International Conference on *"Challenges of Albania's integration in EU"*, organizuar nga: Universiteti i Tiranës, Universiteti i Romës Sapienza dhe U.F.O. University, në datat 6-7 maj 2010. Referati është publikuar në *Conference Proceedings, Vol II, ISBN 978-99956-19-84-8*.

Përveç punimeve shkencore, për shkak të pozicionit të mbajtur si komisionere në Komisionin e Pavarur të Kualifikimit, për një periudhë prej 7,5 vjetësh, kandidatja ka paraqitur edhe tre prej vendimeve të shkruar në cilësinë e relatores.

iii. Vendimi nr. 15, datë 20.04.2018, që i përket subjektit të rivlerësimit Besa Nikëhasani. Ky vendim është lënë në fuqi nga Kolegji i Posaçëm i Apelit me vendim nr. 6, datë 12.09.2018.

Kandidatja ka arsyetuar se ka përzgjedhur këtë vendim sepse, përveç faktit që ka kaluar filtrin e KPA dhe GJEDNJ, ky është i vetmi vendim që është arsyetuar bazuar në konceptin e dyfishit të pasurisë së ligjshme, sipas pikës 4 të nenit D të Aneksit të

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

Kushtetutës dhe ky arsyetim është konsideruar i drejtë nga KPA dhe GJEDNJ (Çështja Nikëhasani kundër Shqipërisë).

iv. Vendimi nr. 402, datë 17.06.2021, që i përket subjektit të rivlerësimit Agim Dalipaj. Edhe ky vendim është lënë në fuqi nga Kolegji, me vendimin nr. 29, datë 13.07.2023.

v. Vendimi nr. 646, datë 13.04.2023, që i përket subjektit të rivlerësimit Fahrije Stringa (Budo). Ky vendim konfirmimi mori formë të prerë, sepse nuk u ankimua.

42. Mbështetur në këto të dhëna të rezultateve në ushtrimin e detyrës, si dhe në tematikën e përmbajtjen e produkteve profesionale të lidhura me ushtrimin e detyrës apo edhe me ushtrimin e profesionit, Këshilli vlerëson se *në aspektin sasior* kandidatja Genta Tafa Bungo ka tregues pozitiv angazhimi profesional, i cili rezulton të jetë mbi atë që mund të gjykohet si një angazhim i zakonshëm apo “mesatar” në ushtrimin e profesionit. Për këto arsye, Këshilli çmoi ta vlerësojë kandidaten Genta Tafa Bungo për këtë kriter ligjor vlerësimi me **33 Pikë**.

43. Për sa i përket *vlerësimit cilësor*, Këshilli shqyrtoi të dhënat që rezultojnë nga jetëshkrimi dhe dokumentacioni i paraqitur nga vetë kandidatja Genta Tafa Bungo, veçanërisht pesë prej dokumenteve të përzgjedhura prej saj, me synimin për të evidentuar, bazuar në tregues shkencorë, elementë që dëshmojnë arritjen e rezultateve profesionale, shkallën e këtyre arritjeve, përfshirë elementë që nga këto dokumente profesionalë dhe në tërësi nga veprimtaria profesionale e kandidates dëshmojnë spikatjen dhe dallueshmërinë e saj në kuptimin dhe qëllimin për të cilin Kushtetuta dhe ligji e përcakton si kusht për vlerësimin e kandidaturës për këtë Këshill dhe, më tej, për përzgjedhjen e gjyqtarit të Gjykatës Kushtetues nga organet e emërtesës.

44. Në veprimet përgatitore të kryera gjatë procedurave të verifikimit të kandidaturës, kandidatja Genta Tafa Bungo ka depozituar pranë Këshillin dokumentacionin përkatës për vlerësim, pesë dokumentat e përzgjedhur prej saj më lart. (*shiko pikat i-v*).

45. Në lidhje me tërësinë e dokumenteve profesionale të paraqitura nga kandidatja Genta Tafa Bungo, për realizimin e vlerësimit profesional dhe të pikëzimit përkatës për këtë kriter ligjor vlerësimi, Këshilli shqyrtoi dhe bisedoi në mënyrë të posaçme dhe të kujdesshme përmbajtjen e tyre, duke u mbështetur mbi indikatorë shkencorë, sikurse janë edhe ato të përmendura në Shtojcën nr. 1 të vendimit sipas vendimit nr. 5 datë 02.04.2019 të këtij Këshilli, si edhe orientime që përmbahen në Metodologjinë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin nr. 51, datë 21.06.2019.

46. Dokumentet profesionale të shqyrtuara trajtojnë tematika të ndryshme që lidhen me: *publikime shkencore në fushën e taksimit dhe decentralizimit; dhe vendime të organit ku kandidatja ka ushtruar detyrën e Komisioneres dhe Kryetares njëkohësisht/posacërisht për vendimet e KPK, kandidatja ka përzgjedhur ato në të cilat ka patur rolin e relatores së çështjeve.*

47. Një ndër indikatorët vlerësues të dokumenteve profesionalë është “*Originaliteti dhe/ose impakti*”, duke marrë në konsideratë faktin se nuk ka të dhëna për plagjiaturë të

dokumentit dhe ky i fundit përbën një vlerë të çmuar në akademi për shkak të impaktit në publik. Nisur nga profili profesional dhe angazhimi akademik në kohë të shtrirë i kandidates Genta Tafa Bungo, përmbajtja e dokumenteve të përzgjedhura, dobisë së përdorimit të tyre nga profesionistë të fushës por edhe nga grupe interesi dhe publiku i gjerë, Këshilli vëren se publikimet dhe artikujt e analizuar dëshmojnë qasje profesionale origjinale veçanërisht mbi të drejtën financiare, duke analizuar mes te tjerave elementë të tatimit të të ardhurave personale edhe në vështirim krahasues në rrafshin evropian.

48. Rëndësia praktike e punimit qëndron në evidentimin e boshllëqeve ligjore dhe institucionale që pengojnë konsolidimin e një sistemi financiar të qëndrueshëm në Shqipëri. Autorja nuk kufizohet vetëm në përshkrim, por bën një analizë kritike mbi paqëndrueshmërinë e legjislacionit dhe pasojat që kjo sjell në sigurinë juridike, në administrimin e të ardhurave publike dhe në marrëdhënien mes shtetit dhe qytetarit. Kjo qasje kritike i shton vlerë shkencore punimit, duke e bërë një kontribuues serioz në literaturën e limituar shqiptare mbi të drejtën financiare. Gjithashtu, punimi nxjerr në pah perspektivën krahasuese me praktikën evropiane, duke u fokusuar në harmonizimin e parimeve dhe standardeve. Ky aspekt i jep rëndësi të veçantë, pasi e vendos diskutimin në një kontekst më të gjerë akademik dhe politik, të domosdoshëm për vendin në rrugën e tij të integritetit evropian.
49. Kandidatja është gjithashtu autore e disa punimeve në fushën e decentralizimit, për shkak dhe të eksperiencës së saj në institucionet përgjegjëse për politikën e pushtetit vendor. Në këto tematika të trajtuara, kandidatja shfaqet si një studiuese me aftësi të mirëfillta për të ndërtuar një analizë të qartë dhe e aftë për të paraqitur çështje juridike me rëndësi për kohën dhe kontekstin. Autorja sjell një qasje kritike mbi ndërhyrjet e qeverisë qendrore në kompetencat fiskale të njësisë vendore, duke i argumentuar me të dhëna empirike nga Ministria e Financave dhe INSTAT, si dhe me referenca në jurisprudencën kushtetuese. Ky punim kontribuon në debatin shkencor dhe praktik për forcimin e vetëqeverisjes vendore, duke evidentuar rreziqet e kufizimit të burimeve financiare dhe duke theksuar nevojën për garanci ligjore e kushtetuese që sigurojnë balancën mes pushtetit qendror dhe atij lokal.
50. Çdo punim është i organizuar me kujdes, me një rrjedhë logjike që ndihmon lexuesin të kuptojë si aspektet thelbësore, ashtu edhe nuancat më të ndërlikuara të çështjeve të trajtuara. Analiza ligjore është e mbështetur në legjislacion dhe referon vazhdimisht në literaturë shqiptare dhe të huaj, çka tregon për një hulumtim të thelluar të temës së trajtuar. Përmes këtij kombinimi të mendimit kritik, përpunimit të kujdesshëm të informacionit dhe stilit të qartë hartues, autorja paraqitet si një kontribuuese e rëndësishme në fushën e të drejtës financiare.
- Në lidhje me materialet e tjera të sjella për vlerësim pranë Këshillit, vendime të KPK për tre subjekte, të cilat janë rezultat i punës së kandidates si Komisionere relatores pranë KPK, vihet re një trajtim i elementëve të ngritur në ri-vlerësim kryesisht në rrafshin e vlerësimit financiar, paraqitur me linjë të qartë logjike.
51. Për sa i përket treguesit vlerësues të lidhur me “*Aftësitë analitike*”, Këshilli vëren se posaçërisht pesë dokumentet profesionale të shqyrtuara, sikurse edhe në rastin e publikimeve dhe artikujve profesionalë, kandidatja Genta Tafa Bungo tregon zotërim të aftësive analitike për të përpunuar informacionin dhe për të identifikuar, arsyetuar dhe zbatuar konceptet ligjore, parimet dhe institutet e së drejtës, sipas natyrës dhe qëllimit

të vetë këtyre punimeve. Më vecanërisht në lidhje me vendimet e përcjella në cilësinë e relatores në KPK, vërehet se cilësia e argumentimit dhe koherenca e arsytimit ligjor kanë qenë vendimtare në konfirmimin e tyre nga instancat më të larta. Vendimet e hartuara dallohen jo vetëm për korrektesën formale dhe qartësinë e strukturës, por edhe për mënyrën origjinale të trajtimit të çështjeve komplekse, duke ofruar interpretime të reja e të qëndrueshme. Veçanërisht, dallon konceptimin dhe arsytimin e çështjeve që lidhen me nocionin e “dyfishit të pasurisë së ligjshme”, të parashikuar në pikën 4 të nenit D të Aneksit të Kushtetutës. Ky interpretim i zhvilluar sjell një qasje të balancuar mes normës kushtetuese dhe praktikës gjyqësore, duke u vlerësuar si i drejtë nga Komisioni i Posaçëm i Apelit dhe më pas edhe nga Gjykata Evropiane e të Drejtave të Njeriut¹.

52. Në lidhje me treguesin vlerësues “*Aftësitë kërkimore*”, Këshilli shqyrtoi dokumentet profesionale të përzgjedhura nga kandidatja Genta Tafa Bungo, sikurse edhe publikimet dhe artikujt profesionalë, të paraqitur në dosjen e kandidatit. Nga ky shqyrtim, Këshilli vëren se këto punime të qendëruara në trajtimin e tematikave të lidhura me tatimet dhe decentralizimin, të para si në rrafshin kombëtar ashtu dhe në mënyrë të krahasuar më kontekstin europian, përbëjnë punë kërkimore.
53. Për arritjen e lëndës së trajtuar dhe qëllimin e trajtimit shkencor, nga përmbajtja e secilit prej punimeve të shqyrtuara, adresohen analiza krahasimore duke përdorur burime të ndryshme të doktrinës dhe legjislacionit fiskal e rregullator vendas dhe ndërkombëtar. Megjithë kujdesin lidhur me rregulltësinë e citimeve të burimeve të përdorura kërkohet më shumë vëmendje në uniformitetin e citimeve dhe stilit të tyre.
54. Për treguesit “*Saktësia dhe precizoni*”, në thelb, u verifikua nëse në veprimtarinë profesionale të kandidatit janë mbuluar me profesionalizëm tematika e përzgjedhur dhe materiali ka shmangur përsëritjet apo citimet e panevojshme etj. Nga shqyrtimi i dokumenteve profesionale të përzgjedhura nga kandidatja Genta Tafa Bungo, Këshilli vëren se këto punime tregojnë profesionalizëm të parashtrimit të problemeve juridike. Terminologjia e përdorur është e saktë dhe në përputhje me standardet e gjuhës juridike, çka tregon jo vetëm kujdesin e kandidatës, por edhe zotërimin e plotë të fushës. Gjithashtu, kandidatja ka ditur të përdorë në mënyrë të balancuar burimet doktrino-re, ligjore dhe praktikë gjyqësore, duke i integruar ato si mbështetje në argumentim, pa rënë në përsëritje mekanike ose në mbingarkesë citimesh. Këto elemente, të kombinuara, dëshmojnë jo vetëm një nivel profesionalizmi dhe rigoroziteti shkencor, por edhe aftësinë për të komunikuar qartë.
55. Në lidhje me treguesin vlerësues “*Qartësia*”, Këshilli shqyrtoi dokumentet profesionale të përzgjedhura nga kandidatja Genta Tafa Bungo, sikurse edhe publikimet dhe artikujt profesionalë të paraqitur në dosjen e kandidatit. Këshilli vëren se këto punime janë të organizuara dhe strukturuara në mënyrën e duhur, gjuha e përdorur është e pasur dhe profesionale.
56. Këshilli, pasi shqyrtoi të dhënat që rezultojnë nga jetëshkrimi dhe dokumentacioni i paraqitur nga vetë kandidatja Genta Tafa Bungo, për sa i përket vlerësimit cilësor, vjen

¹ Shiko Çështjen Nikëhasani kundër Shqipërisë

në përfundimin se kandidatja Genta Tafa Bungo vlerësohet në total me **153.5 Pikë**.

C. Meritat profesionale – Kualifikimi Shtesë Profesional

57. Në shkronjën “b” të pikës 2 dhe shkronjën “b” të pikës 3 të nenit 7/a të ligjit nr. 8577/2000, në shkronjën “b” të pikës 1 të nenit 240 të ligjit nr. 115/2016, si edhe në vendimin nr. 5 datë 02.04.2019 të Këshillit të Emërimeve në Drejtësi të nxjerrë në bazë e për zbatim të ligjit, në lidhje me kualifikimin e shtesë profesional, përcaktohen si kriteret vlerësimi që kandidatët të kenë veprimtari të njohur në fushën e të drejtës kushtetuese, të drejtave të njeriut dhe në sfera të tjera të së drejtës, vlerësim të dallueshëm të rëndësisë së punimeve akademike, studimeve shkencore, shkrimeve dhe ligjëratave profesionale, botimeve, si dhe pjesëmarrjen në aktivitete shkencore, përvojë të veçantë në një fushë të caktuar të së drejtës, ose këshilltar ligjor i Gjykatës Kushtetuese a Gjykatës së Lartë, si edhe pjesëmarrje të dallueshme në procesin e hartimit ose të konsultimit të legjislacionit dhe çdo angazhim tjetër profesional të kandidatit përgjatë 5 viteve të fundit në fushën e së drejtës.
58. Prandaj, në zbatim të ligjit, në varësi edhe të profileve dhe karrierave profesionale të secilit kandidat, nga totali prej 12 pikësh për këtë kategori vlerësimi, Këshilli i Emërimeve në Drejtësi vlerëson deri në 8 pikë ekspertizën në të drejtën kushtetuese dhe në të drejtat e njeriut ose ekspertizën në fusha të tjera të veçanta të së drejtës. Gjithashtu, Këshilli vlerëson deri në 4 pikë angazhimet profesionale shtesë të kandidatëve. Në arsyetimin dhe përfundimet e tij Këshilli mban parasysh rregullat e hollësishme të përcaktuara me vendimin normativ nr. 5 datë 02.04.2019 të këtij Këshilli, si edhe orientimet në përcaktimin e pikëve përkatëse të merituar sipas Metodologjisë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin nr. 51 datë 21.06.2019.

Specializimi në të drejtën kushtetuese, të drejtat e njeriut ose në fusha të tjera të së drejtës

59. Për sa i përket kriterit të parë vlerësues, *ekspertizës në të drejtën kushtetuese dhe në të drejtat e njeriut ose ekspertizës në fusha të tjera të veçanta të së drejtës*, nisur nga të dhënat që rezultojnë nga jetëshkrimi, motivimi për kandidim, intervista dhe dokumente të tjera zyrtare mbi rezultate të vlerësimit profesional etj., si edhe nga shqyrtimi i dokumentet profesionale të paraqitura nga kandidatja Genta Tafa Bungo, Këshillit i rezulton se karriera profesionale e kësaj kandidate është fokusuar kryesisht në profilin akademik, ku në role dhe detyra të ndryshme ka ushtruar mësimdhënien / lektorimin në lëndë të ndryshme, si dhe ka mbajtur funksione të rëndësishme në organe kushtetuese.
60. Këshilli vëren se në formimin profesional, specializimin dhe ekspertizën e posaçme profesionale të fituar nga kandidatja Genta Tafa Bungo, një rol të veçantë ka edhe interesi i treguar vetjak profesional për ushtrimin e vazhdueshëm të veprimtarisë akademike pranë universiteteve publike dhe private. Nga ana tjetër, edhe rrugëtimi i saj

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

personal në fushën akademike dhe studimet e ndjekura, kanë ndikuar në formimin profesional dhe specializimin e kësaj kandidateje në fushën e të drejtave me karakter ekonomik dhe posaçërisht në fushën e të drejtës financiare, në të cilën ka analizuar gjerësisht taksimin e dyfishtë dhe ndërlidhjen e tij me proceset e decentralizimit.

Angazhimi i saj i fundit në cilësinë e Komisioneres së KPK, pavarësisht se një institucion kushtetues, ardhur si rezultat i reformave themelore në drejtësi, ka një ekspozim ndaj të drejtës kushtetuese, por jo në mënyrë të veçante domethënëse.

61. Prandaj, në lidhje me kriterin vlerësues të *"ekspertizës në të drejtën kushtetuese dhe në të drejtat e njeriut ose në fusha të tjera të së drejtës"* Këshilli vlerëson t'i caktojë kandidates Genta Tafa Bungo **56 Pikë**.

Angazhime profesionale shitesë

62. Nga aktet e dosjes dhe nga vetë deklaratimet e kandidates Genta Tafa Bungo, rezultojnë se ka pasur këto angazhime shitesë profesionale:

Pjesëmarrje në Konferenca shkencore:

- a) 6-7 Maj 2010- "European challenge in the field of personal income tax" in: Tirana International Conference on "Challenges of Albania's integration in EU", organized by: UT, Sapienza and U.F.O. University.
- b) 21 Maj 2010- "Përmirësimi i procedurave tatimore në rrugën drejt Bashkimit Evropian" në Konferencën Nderkombëtare "Legislacioni dhe drejtësia shqiptare përballë sfidave të integritetit në Bashkimin Evropian", organizuar nga Universiteti "Justiniani I", Shkolla e Magjistraturës Tiranë, Universiteti Shtetëror i Tetovës.
- c) 10 Dhjetor 2010- "Local finances - the challenge of the South-Eastern Europe countries in their way towards EU" in International Conference on "Challenges of Economic European Integration Western Balkan", organized by: Luigi Gurakuqi University, Faculty of Business, Shkodër. Bashkëautore e pare.
- d) 11-12 Dhjetor 2010- "The albanian tax legislation facing the challenge of reformation towards european integration" në Konferencën Ndërkombëtare të organizuar nga Fakulteti i Ekonomisë i Universitetit të Tiranës me temë "Economic & Social Challenges and Problems 2010 - At the time of Global Crisis and Integration": Bashkëautore e pare.
- e) 27 Shkurt 2011- "Reformimi i administratës tatimore - garanci për të drejtat e tatimpaguesve" në: Konferencën Shkencore Kombëtare : "Mekanizmat mbrojtës të të drejtave të individëve në kuadër të procesit të rregullt ligjor", organizuar nga Fakulteti i Drejtësisë, Departamenti i së Drejtës Publike në bashkëpunim me Qendrën për Nisma Ligjore Qytetare.
- f) 8-9 Prill 2011- "The challenge of fiscal decentralisation in Albania and other transition countries" in: Third International Scientific Conference: "Economic Policy and EU Integration", organized by: Aleksander Moisiu University, Faculty of Business, Durrës. Bashkëautore e parë.

Këshilli i Emërimeve në Drejtësi 2025

Adresa Postare : GJKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

- g) 30 Prill 2011- "Decentralizimi financiar në Shqipëri dhe sfidat e tij" në: Konferencën Kombëtare : "Qeverisja vendore ne Shqipëri: realitete, sfidat dhe e ardhmja ne kuader te proceseve integruese te vendit" te organizuar nga UET.
- h) 23-24 Shtator 2011- "The role of courts in resolving business disputes in South Eastern Europe" in: "1st International Scientific Conference: "European integration of SEE countries - challenges or reality" organized by "Eqrem Cabej" University of Gjirokastra - Economic Department.
- i) 4-5 Nëntor 2011- "The crime of tax evasion in transition economies" in: First International Scientific Conference on "The State, Society and Law : Between Transition and Consolidation", organized by: Aleksander Moisiu University, Faculty of Political Sciences and Law, Durres.
- j) 20 Tetor 2012- "Domicile and residence of individuals under EC Law and Albanian Legislation" in: First International Conference on "South-East European Countries towards European Integration" organized by: Universiteti "Aleksander Xhuvani", Fakulteti Ekonomik, Elbasan;

Kandidatja gjithashtu ka qënë e angazhuar si Sekretare e Përgjithshme e Dhomës Kombëtare të Përmbaruesve Gjyqësore, Pedagoge e Jashtme në një seri universitetesh publike dhe private², si edhe Këshilltare e Jashtme pranë Ministrit të Integritetit.

63. Nga të dhënat që rezultojnë nga jetëshkrimi, motivimi për kandidim, intervista dhe dokumentet e tjera zyrtare të administruara në dosjen e kandidimit, rezulton se kandidatja Genta Tafa Bungo, krahas periudhës të përllogaritur si vjetërsi në profesion, ka ushtruar edhe veprimtari profesionale shtesë si lektore me kohë të pjesshme. Këto angazhime shtesë profesionale janë të lidhura me kontribute dhe pjesëmarrje në përgatitjen e analizave ligjore dhe studimeve mbi çështje të ndryshme të legjislacionit bankar, financiar shqiptar dhe ndërkombëtar. Cfarë vihet re në shqyrtimin e jetëshkrimit të kandidatës është se për periudha të ndryshme, si Shkurt 1996-Shtator 2003, edhe pse në cilësinë e asistent pedagoges ajo ka mbajtur detyrën e përgjegjëses së sektorit të lëndëve teorike e historike, në Departamentin e të Drejtës Publike. Ky angazhim, tregon për një nivel të profesionalizmit akademik i cili vlen të mbahet parasysh në mënyrë të vecantë.
64. Prandaj, duke pasur parasysh këto angazhime shtesë profesionale, të shtrira në kohë dhe me kontribute konkrete profesionale në disa nga fushat më të rëndësishme të së drejtës, Këshilli vlerëson që për kriterin vlerësues të “angazhimeve profesionale shtesë”, t’i caktojë kandidatës Genta Tafa Bungo **29 Pikë**.

Meritat Morale

² Fakulteti i Drejtësisë, Universiteti i Tiranës, Universiteti i Elbasanit “Aleksandër Xhuvani”, “Albanian University”, Universiteti Europian i Tiranës, Kolegji Luarasi, Universiteti “Marin Barleti”, Universiteti “Kristal”, Universiteti “Justicia”

65. Në shkronjën “c” të pikës 2 të nenit 7/a të ligjit nr. 8577/2000 si kriter vlerësimi është përcaktuar që kandidatët të jenë vlerësuar për *“integritetin etik e moral”*. Po kështu, në shkronjën “a” të pikës 1 të nenit 240 të ligjit nr. 115/2016 përcaktohen si kriter *“Rezultatet e vlerësimit të etikës së kandidatëve gjatë punës, nëse ka”*, ndërsa në shkronjat “a” dhe “b” të pikës 2 të këtij neni përcaktohen si kritere vlerësimi edhe *“Reputacioni që gëzon kandidati në shoqëri dhe midis kolegëve”* dhe *“cilësitë morale, të tilla si ndershmëria, përpikëria në ushtrimin e detyrave, drejtësia në marrjen e vendimeve, përgjegjshmëria, besueshmëria, paanësia, dinjiteti dhe prirja për të marrë përsipër përgjegjësi”*. Së fundi, në shkronjën “c” parashikohet si kriter vlerësimi edhe *“angazhimi i provuar në ndjekje të kauzave të shoqërisë civile”*. Në bazë dhe për zbatim të ligjit, lidhur me këto kritere vlerësimi, Këshilli i Emërimeve në Drejtësi ka nxjerrë vendimin normativ nr. 5 datë 02.04.2019 ku përcaktohen rregullime më të hollësishme si edhe shpërndarja e pikëve të vlerësimit sipas peshës specifike të këtyre kritereve.
66. Prandaj, në zbatim të ligjit, lidhur me meritat morale, nga totali prej 30 pikësh për të tre komponentët vlerësues, Këshilli i Emërimeve në Drejtësi vlerëson deri në 18 pikë *integritetin etik dhe moral*, deri në 10 pikë *reputacionin që gëzon kandidati në shoqëri dhe midis kolegëve* dhe deri në 2 pikë *angazhimin e provuar në ndjekje të kauzave të shoqërisë civile*. Në arsyetimin dhe përfundimet e tij Këshilli mban parasysh rregullat e hollësishme të përcaktuara me vendimin normativ nr. 5 datë 02.04.2019 të këtij Këshilli dhe Shtojcën nr. 1 të tij, si edhe orientimet në përcaktimin e pikëve përkatëse të merituar sipas Metodologjisë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin nr. 51 datë 21.06.2019.
67. Në lidhje me “meritat morale”, krahas të dhënave që rezultojnë nga jetëshkrimi, mbahen parasysh edhe gjetjet në procedurën e verifikimit të kandidatit, ku përmbahen të dhëna që kanë të bëjnë apo mund të përdoren për efekte të vlerësimit të integritetit etik e moral të kandidatit, angazhime në kauza të shoqërisë civile etj. Gjithashtu, për këtë komponent të vlerësimit mbahen parasysh edhe të dhëna e përfundime që mund të nxirren gjatë intervistës së kandidatit me Këshillin e Emërimeve në Drejtësi.
68. Nga kandidati në lidhje me këtë kriter nuk janë dorëzuar dokumente që kanë të bëjnë me vlerësime të marra nga institucionet pranë të cilës ka ushtruar veprimtarinë profesionale.
69. Në rastin e kandidates Genta Tafa Bungo, krahas jetëshkrimit, paraqitjes dhe sjelljes gjatë parashtrimeve në intervistë, motivimit për kandidim dhe historikut të komunikimit të kandidatit me Këshillin gjatë procesit të verifikimit dhe vlerësimit të kandidaturës, Këshilli i Emërimeve në Drejtësi shqyrtoi të dhënat nga dokumentet profesionale, aktet e tjera zyrtare të administruara në dosjen e kandidatit, si edhe çdo të dhënë a dokument tjetër të aksesueshëm publikisht nëpërmjet të cilave mund të nxirreshin elementë të dobishëm për qëllimet e verifikimit dhe vlerësimit të meritave morale të këtij kandidati.

Integriteti etik e moral

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

70. Për sa i përket kriterit të parë vlerësues, *integritetit etik e moral*, nisur nga të dhënat që rezultojnë nga jetëshkrimi, motivimi për kandidim, intervista, komunikimi i kandidatit me Këshillin gjatë procedurave të verifikimit dhe vlerësimit, si edhe nga të dhëna të tjera të disponueshme gjatë procedurës së verifikimit, Këshilli i rezulton se kandidatja Genta Tafa Bungo në veprimtarinë, sjelljen dhe komunikimin e saj tregon angazhim në përmbushjen e detyrave profesionale dhe në ushtrimin e profesionit, si edhe vëmendje për t'iu përgjigjur me kujdesin e duhur pyetjet të cilat i drejtohen nga bashkëbiseduesit.
71. Prandaj, në lidhje me kriterin vlerësues të “*integritetit etik e moral*” Këshilli vlerëson ti caktojë kandidates Genta Tafa Bungo **125 Pikë**.

Reputacionin që gëzon kandidati në shoqëri dhe midis kolegëve

72. Për sa i përket kriterit të dytë vlerësues “*reputacioni që gëzon kandidati në shoqëri dhe midis kolegëve*”, nisur nga të dhënat që rezultojnë nga jetëshkrimi, motivimi për kandidim, intervista, komunikimi i kandidatit me Këshillin gjatë procedurave të verifikimit dhe vlerësimit, si edhe nga dokumente të tjera zyrtare apo të aksesueshme publikisht, Këshilli i rezulton se kandidatja Genta Tafa Bungo në veprimtarinë, sjelljen dhe komunikimin e saj nuk heziton të tregojë angazhim në përmbushjen e detyrave të saj. Sipas të dhënave që disponohen Këshilli i rezulton se kandidatja Genta Tafa Bungo reflekton përgjegjshmëri në angazhimet e saj profesionale. Përveç kësaj, vlerësohet se ajo ka fituar respektin e kolegëve dhe bashkëpunëtorëve të saj, tregues i të cilës është dhe përzgjedhja e saj si Kryetare e KPK.
73. Prandaj, në lidhje me kriterin vlerësues të “*reputacioni që gëzon kandidati në shoqëri dhe midis kolegëve*” Këshilli vlerëson ti caktojë kandidates Genta Tafa Bungo **69 Pikë**.

Angazhimi i provuar në ndjekje të kauzave të shoqërisë civile

74. Për sa i përket kriterit të dytë vlerësues “*angazhimi i provuar në ndjekje të kauzave të shoqërisë civile*”, nisur nga të dhënat që rezultojnë nga jetëshkrimi, motivimi për kandidim, intervista, komunikimi i kandidatit me Këshillin gjatë procedurave të verifikimit dhe vlerësimit, si edhe nga dokumente të tjera zyrtare apo të aksesueshme publikisht, Këshilli i rezulton se, kandidatja Genta Tafa Bungo nuk ka qenë e angazhuar në veprimtari të tjera, në ndjekje të kauzave të shoqërisë civile.
75. Prandaj, në lidhje me kriterin vlerësues “*angazhimi i provuar në ndjekje të kauzave të shoqërisë civile*” Këshilli vlerëson kandidaten Genta Tafa Bungo me **1 Pikë**.

Meritat organizative, drejtuese dhe menaxheriale

76. Në nenin 240 të ligjit nr. 115/2016 parashikohen si kritere vlerësimi disa komponentë të lidhura me aftësitë profesionale dhe personale të kandidatëve mbi çështjet e natyrës

Këshilli i Emërimeve në Drejtësi 2025

Adresa Postare : GJKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

drejtuese, organizative, të kapacitetit për vendimmarrje, punës në grup, të komunikimit dhe përfaqësimit publik. Kështu, në pikën 3 të këtij neni parashikohen kriteret vlerësuese për kandidatët si më poshtë:

“a) cilësinë e platformës dhe të vizionit që paraqesin”;

b) aftësitë e provuara për të marrë vendime dhe përgjegjësi bazuar në përvojat e mëparshme profesionale dhe shoqërore;

c) aftësitë e komunikimit;

ç) aftësitë e të punuarit në grup dhe në ambiente multi-disiplinore ose multi-kulturore;

d) aftësitë e përfaqësimit publik”.

77. Në bazë dhe për zbatim të ligjit, lidhur me këto kriteret vlerësimi, Këshilli i Emërimeve në Drejtësi ka nxjerrë vendimin normativ nr. 5 datë 02.04.2019 ku përcaktohen rregullime më të hollësishme si edhe shpërndarja e pikëve të vlerësimit sipas peshës specifike të këtyre kriterëve.

78. Prandaj, në zbatim të ligjit, lidhur me meritat organizative, drejtuese dhe menaxheriale, nga totali prej 10 pikësh për të pesë komponentët vlerësues të sipërcituar, Këshilli i Emërimeve në Drejtësi vlerëson deri në 3 pikë *cilësinë e platformës dhe të vizionit që paraqesin* kandidatët, deri në 4 pikë *aftësitë e provuara për të marrë vendime dhe përgjegjësi bazuar në përvojat e mëparshme profesionale dhe shoqërore*, deri në 2 pikë *aftësitë e komunikimit dhe aftësitë e përfaqësimit publik*, si edhe me 1 pikë për *aftësitë e të punuarit në grup dhe në ambiente multi-disiplinore ose multi-kulturore*. Në arsyetimin dhe përfundimet e tij, Këshilli mban parasysh rregullat e hollësishme të përcaktuara me vendimin normativ nr. 5 datë 02.04.2019 të këtij Këshilli dhe Shtojcën nr. 1 të tij, si edhe orientimet në përcaktimin e pikëve përkatëse të merituar sipas Metodologjisë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin nr. 51 datë 21.06.2019.

79. Në rastin e kandidates Genta Tafa Bungo, krahas jetëshkrimit, paraqitjes dhe sjelljes gjatë parashtrimeve dhe bisedës në intervistë, përmbajtjes së motivimit për kandidim dhe historikut të komunikimit të kandidatit me Këshillin gjatë procesit të verifikimit dhe vlerësimit të kandidaturës, Këshilli i Emërimeve në Drejtësi shqyrtoi të dhënat nga dokumentet profesionale, aktet e tjera zyrtare të administruara në dosjen e kandidatit, si edhe çdo të dhënë a dokument tjetër të aksesueshëm publikisht nëpërmjet të cilave mund të nxirreshin elementë të dobishëm për qëllimet e verifikimit dhe vlerësimit të meritave organizative, drejtuese dhe menaxheriale të kësaj kandidateje.

Cilësia e platformës dhe të vizionit

80. Këshilli shqyrtoi përmbajtjen e dokumentit me shkrim, platformës mbi motivimin e kandidimit dhe vizionit të kandidates Genta Tafa Bungo lidhur me qasjen dhe qëndrimet e saj mbi rëndësinë dhe aspektet thelbësore të ushtrimit të detyrës së gjyqtarit të

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

Gjykatës Kushtetuese, mbi sfidat kryesore me të cilat është përballur dhe duhet të përballlet Gjykata Kushtetuese në ushtrimin e përgjegjësve dhe kompetencave që i ngarkon Kushtetuta dhe ligji. Gjithashtu, në vlerësimin e këtij kriteri, Këshilli mban parasysh edhe parashtrimet dhe shpjegimet e dhëna nga kjo kandidatë gjatë intervistës dhe në përgjigje të pyetjeve që iu drejtuan nga anëtarët e Këshillit.

81. Nisur nga dokumenti me shkrim dhe shpjegimet e paraqitura gjatë intervistës, Këshilli vëren se kandidatja Genta Tafa Bungo njihet rëndësinë e misionit, kërkesave etike morale dhe profesionale që dikton pozicioni i gjyqtarit të Gjykatës Kushtetuese si edhe sfidave dhe objektivave të kësaj Gjykate, në respektimin e lirive themelore dhe të drejtave të njeriut dhe në tërësi të mirëfunksionimit të sistemit demokratik dhe shtetit ligjor. Gjithashtu, kjo kandidatë parashtrori platformën e saj në mënyrë koherente duke vënë theksin në metodologjinë e interpretimit dhe rritjen e transparencës.
82. Prandaj, në lidhje me kriterin vlerësues “*cilësia e platformës dhe të vizionit të paraqitur*” Këshilli vlerësoi t’i caktojë kandidatës Genta Tafa Bungo **22.5 Pikë**.

Aftësitë e provuara për të marrë vendime dhe përgjegjësi bazuar në përvojat e mëparshme profesionale dhe shoqërore

83. Lidhur me aftësitë e provuara për të marrë vendime dhe përgjegjësi, Këshilli mbështetet pikësisht në të dhënat që lidhen me përvoja konkrete nga karriera e kandidatëve në funksione dhe pozicione të cilat kërkojnë dhe tregojnë marrjen përsipër të përgjegjësi dhe ushtrimin e vendimmarrjes në ushtrimin e kompetencave dhe përmbushjen e detyrave të ngarkuara. Gjithashtu, në vlerësimin e kandidatëve për këtë komponent vlerësimi, Këshilli mban parasysh se ushtrimi i çdo detyre, funksioni dhe veprimtarie profesionale, edhe kur formalisht nuk lidhet drejtpërdrejt me të drejtën/detyrimin për ushtrimin e kompetencës vendimmarrëse, gjithsesi përmban elementë që tregojnë aftësi të provuara ose premtuese për të marrë nisma, për të kërkuar zgjidhje, për të marrë përgjegjësi si edhe vendimet e duhura e në kohën e duhur sipas përcaktimeve të ligjit dhe në përgjigje të ndjeshmërisë së publikut.
84. Në rastin e kandidatës Genta Tafa Bungo, krahas jetëshkrimit, parashtrimeve dhe bisedës në intervistë, përmbajtjes së platformës dhe motivimit për kandidim, Këshilli i Emërimeve në Drejtësi shqyrtoi të dhënat nga dokumentet profesionale, si edhe aktet e tjera zyrtare të administruara në dosjen e kandidatit, për të evidentuar të dhëna në lidhje me aftësitë e provuara të këtij kandidati për të marrë vendime dhe përgjegjësi edhe në ushtrimin e funksionit të gjyqtarit të Gjykatës Kushtetuese.
85. Këshilli vëren se kandidatja Genta Tafa Bungo, në karrierën e saj profesionale ka ushtruar veprimtari profesionale të natyrës drejtuese dhe bashkërenduese. Konkretisht kjo kandidatë ka ushtruar funksionin e Kryetares së Komisionit të Pavarur të Kualifikimit, Sekretarit të Përgjithshëm të Dhomës Kombëtare të Përmbartuesve Gjyqësorë si dhe ka drejtuar Departamentin e së Drejtës Publike të Universitetit

“Justiniani I”, ka mbajtur detyrën e përgjegjës së Sektorit të lëndëve teorike, në Departamentin e të Drejtës Publike në Fakultetin e Drejtësisë së Universitetit të Tiranës, si dhe ka mbajtur detyrën e titullares së lëndës së shumë prej universiteteve publike apo private ku ka ushtruar mësimdhënien. Në ushtrim të detyrës si udhëheqëse disertacionale për studentet e Doktoraturës pranë UET, ajo ka cuar më tej angazhimin akademik, duke udhëhequr cilësisht tre doktorantë të cilët kanë mbrojtur tezat përkatëse. Të gjitha këto së bashku, tregojnë qartësisht mbi aftësitë e treguara në vendimmarrje dhe drejtim, tregues ky që mbetet një vlerë e shtuar në këtë kriter. Prandaj, në lidhje me kriterin vlerësues “*aftësitë e provuara për të marrë vendime dhe përgjegjësi bazuar në përvojat e mëparshme profesionale dhe shoqërore*”, Këshilli vlerëson t’i caktojë kandidates Genta Tafa Bungo **33 Pikë**.

Aftësitë e komunikimit dhe aftësitë e përfaqësimit publik

86. Aftësitë e komunikimit, në të gjitha format, sikurse edhe në përfaqësimin publik e me të tretët, të shprehurit në mënyrë të qartë, lehtësisht të kuptueshme, të matur, me respekt dhe në mënyrë jo-diskriminuese, luajnë një rol të rëndësishëm në kryerjen e funksionit të gjyqtarit të Gjykatës Kushtetuese.
87. Nga shqyrtimi i jetëshkrimit, mënyra dhe stili i parashtrimeve me shkrim të platformës, sjellja, mënyra e komunikimit dhe argumentimit gjatë bisedës në intervistë, si edhe nga përmbajtja, strukturimi dhe stili i hartimit të dokumenteve profesionale të administruara në dosjen e kandidatit, apo deklaratat dhe intervista publike që ka dhënë në cilësinë e Kryetares së Komisionit të Pavarur të Kualifikimit, Këshilli vëren se kandidatja Genta Tafa Bungo zotëron aftësi të mira për të komunikuar me kujdesin e duhur, për të dëgjuar me profesionalizëm dhe për tu përgjigjur në lidhje me të gjitha çështjet dhe problematikat që ngrihen për trajtim. Zotëron mire komunikimin publik për shkak të angazhimit afatgjatë në akademi si lektore, e si rezultat komunikon rrjedhshëm idetë si dhe është dëgjuese aktive.
88. Prandaj, në lidhje me kriterin vlerësues të “*Aftësitë e komunikimit dhe aftësitë e përfaqësimit publik*”, Këshilli vlerëson ti caktojë kandidates Genta Tafa Bungo **13.5 Pikë**.

Aftësitë e të punuarit në grup dhe në ambiente multi-disiplinore ose multi-kulturale

89. Gjyqtari i Gjykatës Kushtetuese, për vetë natyrën e këtij funksioni, mënyrës së funksionimit dhe kolegjalitetit të kërkuar në veprimtarinë e vendimmarrjes kësaj Gjykate, duhet të zotërojë aftësitë e duhura për një qasje metodike ndaj punës, si dhe aftësinë për të qenë i përfshirë në punën në grup, me gjyqtarët e tjerë, këshilltarët dhe anëtarët e stafit të Gjykatës. Pjesë e kësaj aftësie është edhe nevoja për t’u përshtatur

shpejt me zhvillimet e reja, si edhe ndaj nevojës për t’u përfshirë në veprimtari në ambiente multi-kulturore dhe multi-disiplinore gjatë karrierës gjyqësore.

90. Nga shqyrtimi i jetëshkrimit, sjellja, mënyra e komunikimit dhe argumentimit gjatë bisedës në intervistë, si edhe nga dokumentet profesionale të administruara në dosjen e kandidates, Këshilli vëren se kandidatja Genta Tafa Bungo zotëron aftësi të mira për të punuar në grup dhe ka të dhëna të qarta në drejtim të organizimit të veprimtarive në ambiente multi-kulturore dhe multi-disiplinore. Prezantimi dhe dokumentet profesionale dëshmojnë se kjo kandidate është përfshirë vijimësisht në projekte profesionale me kolegë të tjerë, vendas apo të huaj, për realizimin e veprimtarive, publikimeve shkencore dhe artikujve profesionalë. Një vlerë e shtuar në këtë kuadër është patjetër dhe eksperiencia në funksionin e Kryetares së Komisionit të Pavarur të Kualifikimit (*organ kolegjal*), po ashtu dhe anëtares, në funksion të së cilës ka bashkëpunuar më kolegët vendim- marrës në treshet gjyqësore, në një format *quasi-gjyqësor*.
91. Gjithashtu, zotërimi i këtyre aftësive rezulton i reflektuar edhe në vetë mënyrën e parashtrimit me shkrim të çështjeve në platformën e paraqitur, kryesisht funksionin e kryer si Kryetares së Komisionit të Pavarur të Kualifikimit, si edhe në komunikimin e bisedën e zhvilluar me Këshillin gjatë intervistës.
92. Prandaj, në lidhje me kriterin vlerësues “*Aftësitë e të punuarit në grup dhe në ambiente multidisiplinore ose multikulturore*”, Këshilli vlerëson ti caktojë kandidates Genta Tafa Bungo **8.5 Pikë**.
93. Në përfundim të arsyetimit mbi mënyrën dhe shkallën e vlerësimit për të gjitha kriteret ligjore të parashikuara nga ligji dhe të pikëzimit përkatës të treguar më sipër në këtë Vendim, në funksion të procedurave ligjore të përzgjedhjes së gjyqtarit të Gjykatës Kushtetuese dhe për efekt të renditjes së kandidatëve për vendet vakante në të cilat ka kandiduar, Këshillit të Emërimeve në Drejtësi i rezulton se kandidatja Genta Tafa Bungo vlerësohet në total me **679 pikë në tërësi**, nga vlerësimet e të gjithë anëtarëve të Këshillit për çdo komponent vlerësimi. Sikurse është evidentuar edhe në Kreun II të këtij vendimi rezultati përfundimtar i kandidates (i cili është pasqyruar edhe në tabelat përkatëse që gjenden në faqen zyrtare të Gjykatës së Lartë, në rubrikën KED), përfitohet nga mesatarja kolegjiale e pikëve të nëntë anëtarëve, rrjedhimisht kandidatja Genta Tafa Bungo vlerësohet në total me **(75.44) Pikë**.

PËR KËTO ARSYE:

Në mbështetje të pikës 1 të nenit 149/d të Kushtetutës, të nenit 7/a dhe 7/ç të ligjit nr. 8577/2000 “*Për organizimin dhe funksionimin e Gjykatës Kushtetuese të Republikës së Shqipërisë*”, të nenit 239 dhe 240 të ligjit nr. 115/2016 “*Për organet e qeverisjes së sistemit të drejtësisë*”, të pikës 3, 5, 6, 7, 8, 9, 10 e vijues të Vendimit të Këshillit të Emërimeve në Drejtësi nr. 5 datë 02.04.2019 “*Për Kriteret dhe Procedurën e*

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

Vlerësimin, Pikëzimit dhe Renditjes së Kandidatëve për Pozicionet Vakante në Gjykatën Kushtetuese dhe të Inspektorit të Lartë të Drejtësisë”, Këshilli i Emërimeve në Drejtësi

VENDOSI:

1. Vlerësimin e kandidates Genta Tafa Bungo, me **75.44 Pikë** në vendin vakant për gjyqtar në Gjykatën Kushtetuese, të shpallur nga, Gjykata e Lartë në datën datë 11.12.2024.
2. Në zbatim të nenit 238 të Ligjit nr.115/2016, ky vendim i njoftohet kandidatja Genta Tafa Bungo.
3. Ky vendim publikohet në faqen zyrtare të Gjykatës së Lartë, në pjesën e përcaktuar për Këshillin e Emërimeve në Drejtësi.

ANËTAR	Zv/KRYETARE	KRYETAR
Ilir Toska	Marjana Semini	Sokol Sadushi
ANËTARE	ANËTAR	ANËTARE
Alma Muça	Fuat VJERDHA	Enkela Vlora
ANËTARE	ANËTAR	ANËTARE
Irma Balli	Etien KAPO	Nafije HASKO